

每週經課朗誦經文(巴克禮漢羅/教羅)2014/03/02

共同經課 - 1 出埃及記二十四章十二節~十八節

12 耶和華 kā 摩西講：你上山就近我，tiàm tī chia，我 beh 將石碑 kap 律法，以及誠命，我所寫 ê，賞賜你，thang 教示 in。13 摩西 kap 跟隨伊 ê 約書亞起來；摩西上上帝 ê 山；14 kā 長老講：Lín tiàm chia 等阮，thèng 候阮 tò-tng 來 lín chia；看 ah，亞倫、Hō-jīⁿ kap lín tī-teh；人若有 tǎi-chì，thang 來 chhē in。15 摩西上山，山有雲遮蓋。16 耶和華 ê 榮光停 tī 西奈山，雲遮伊六日久；第七日伊 tùi 雲中叫摩西。17 耶和華榮光 ê 款式，親像火燒 tī 山頂；以色列人親目看見。18 摩西入雲中上山；摩西 tī 山頂四十日四十暝。

共同經課 - 2 詩篇九十九篇

1 耶和華做王，列邦 tiòh ngiāuh-ngiāuh-chhoah；伊坐 tī ki-lōⁿ兵，地 tiòh 搖動。2 耶和華 tī 錫安做大；伊 poáⁿ 過 tī 萬百姓 ê 頂面。3 In tiòh o-ló 你大 koh thang 驚畏 ê 名；伊是至聖。4 王有氣力，歡喜公平；你 hō 正直堅固。Tī 雅各中行公平 kap 義理。5 Lín tiòh 尊重耶和華咱 ê 上帝，Tī 伊腳踏椅 ê 頭前跪拜；伊是至聖。6 Tī 伊 ê 祭司中，有摩西 kap 亞倫，Tī 求叫伊 ê 名 ê 人 ê 中間，有撒母耳；In 求叫耶和華，伊就聽 in。7 伊 tī 雲柱 ê 中間對 in 講話；In 遵守伊干證 ê 話，kap 伊所賞賜 in ê 律法。8 耶和華阮 ê 上帝 ah，你有應 in；你雖然照 in ê 所行報應 in，Iáu-kú 你是赦免 in ê 上帝。9 Lín tiòh 尊重耶和華咱 ê 上帝，Tī 伊 ê 聖山跪拜；因為咱 ê 上帝耶和華是至聖。

共同經課 - 3 彼得後書一章十六節~二十一節

16 因為阮平素 hō lín 知咱 ê 主耶穌基督 ê 權能 kap 伊 ê 降臨，m̄ 是用奇巧無影跡話，就是親目看見伊 ê 大威嚴。17 因為伊 tùi 父上帝得 tiòh 尊貴榮光，hit 時 tùi 極大 ê 榮光有 chit 號聲到 tī 伊，講，Chit-ê 是我疼 ê kiáⁿ，我所歡喜 ê。18 Chit-ê 聲 tùi 天出，阮 kap 伊 tī 聖山 ê 時聽見。19 Koh 咱有先知 ê 話會 koh-khah 堅固，lín 致意 chiah-ê 是好，親像燈照 tī 烏暗，到 tī 天光，啓明星出現 tī lín ê 心 ê 時。20 第一，tiòh 先知，見若聖經中先知 ê 話，無 thang thàn su-khia ê 意思來開拆。21 因為未有先知 ê 話 tùi 人 ê 意思出；就是 tùi 上帝來 ê 人，hō 聖神感動來講。

共同經課 - 4 馬太福音十七章一節~九節

1 過六日，耶穌另外帶彼得、雅各，kap 雅各 ê 兄弟約翰，chhoā in peh 上高山；2 當 in ê 面前形狀變換，伊 ê 面光映映，親像日，伊 ê 衫白，親像光。3 忽然有摩西、以利亞 tùi in 顯現，kap 伊講話。4 彼得應耶穌講，主 ah，咱 tī chia 真好；你若 ài，我 beh tī chia 搭三間寮 á；一間 hō 你，一間 hō 摩西，一間 hō 以利亞。5 伊 iáu teh 講話 ê 時，忽然有光光 ê 雲罩 in，koh 有聲 tùi 雲裡出，講，chit-ê 是我疼 ê Kiáⁿ，我所歡喜 ê；lín tiòh 聽伊。6 學生聽見，就仆落去，盡在驚。7 耶穌進前摸 in，講，起來，莫得驚。8 In kiáh 目，無看見一人，只有耶穌 nā-tiāⁿ。9 落山 ê 時耶穌命令 in，講，人子 iáu-bē tùi 死人中 koh 活，莫得用所看見 ê kā 人講。